

萬 有 文 庫

第 二 集 七 百 種

王 雲 五 主 編

萬 曆 重 修 二 百 二 十 八 卷 本

明 會 典

(三十)

申 時 行 等 重 修

商 務 印 書 館 發 行

萬曆重修二百二十八卷本

明會典

(三十)

申時行等重修

萬有文庫

第二集七百種

總編纂者

王雲五

商務印書館發行

# 明會典卷之四十八 禮部六

## 【册立三】

### 【親王册立儀】

凡親王册立。洪武初。皇帝預告太廟。及期臨軒拜册。年幼者則遣官保抱以從事。成化末年更定。卽日告內殿。廷遣節使就各王府册立之。罷預告臨軒之禮。

### 洪武三年定

前期擇日奏告太廟。至日設寶册案五座于殿中。寶册亭十座于丹陛上之東。皇太子侍立於御座之東。諸王拜位於丹陛上。及御座前。俱北面。其餘陳設侍衛執事俱與册東宮儀同。是日早。百執事各就位。鼓三嚴。侍儀奏中嚴。皇帝於謹身殿具袞冕。皇太子於奉天門具冕服。親王各具九章冕服。引班分引文武百官入侍立位。侍儀版奏外辦。皇帝出御奉天殿。尙寶卿捧寶及導從奏樂如常儀。鳴鞭司晨報時訖。引進四人引皇太子。引禮四人引親王。俱由奉天門東入。樂作。陛自東陞。皇太子由殿東門入。引進立候於門外。內贊接引至侍立位。親王入至丹墀拜位。引禮分立于左右。樂止。捧受册寶。內使由西陞。陛俱入就丹陛立位。知班于丹墀中唱班齊贊禮于丹陛上贊鞠躬。樂作。再拜。樂止。內贊贊承制官跪承制訖。由

殿中門出。立于中門外。稱有制。贊禮贊親王皆跪。宣制云。封皇子某爲某王。某爲某王。皇從孫某爲某王。畢。贊諸王皆俯伏。興。承制官由殿西門入。跪於殿中。奏傳制畢。復位。贊禮贊諸王鞠躬。樂作。再拜。樂止。贊禮贊行禮。引禮引秦王由殿東門入。樂作。引禮立於門外。內贊接引秦王入。至御座前拜位。樂止。內贊贊受冊寶。捧冊寶官於案前跪。捧冊授讀冊官。內贊贊讀冊。讀冊官跪讀冊訖。以冊授丞相。丞相措笏受冊。內贊贊措圭。贊受冊。丞相以冊跪授秦王。捧受冊寶。內使跪於王西。捧冊與立於王西。捧冊寶官又於案前跪。捧寶授讀寶官。內贊贊讀寶。讀寶官跪讀寶訖。以寶授丞相。丞相捧寶跪授秦王。捧受冊寶。內使跪于王西。捧寶與立于捧冊內使之下。內贊贊出圭。俯伏。興。贊復位。引禮引秦王出。樂作。內使捧冊寶前導。出至殿東門。引禮引秦王復位。樂止。內使以冊寶置于冊寶亭盪匣中。退立於丹陛之東。引禮引以次諸王俱入殿受冊寶。并內使捧受。皆如上儀畢。贊禮贊秦王以下皆鞠躬。樂作。四拜。樂止。內使昇親王五位冊寶亭前行。引禮導王俱由東階降。樂作。奉迎冊寶官奉迎出。奉天門東。樂止。時齊潭趙魯四王年幼遣官齋冊寶授之。其儀。內贊贊承制官稍前。丞相前立于殿西。內贊贊丞相跪承制訖。讀冊寶官捧四王冊寶俱由中門出。內使昇冊寶亭至丹陛中。讀冊讀寶官以冊寶置于盪匣中。執事昇冊寶亭前行。授冊寶官丞相一同由中階降。讀冊寶官由西門入殿復位。捧受冊寶。內使四人由西陛降。從丞相由丹陛轉謹身殿之東。進至王宮門外。冊寶亭暫駐于門外正中。內使監官出迎于冊寶亭西南。跪。東北向。授冊

寶官丞相東北立，西南向。稱有制。宣制曰：封皇子某爲某王，某爲某王，畢。授冊寶官丞相出。內使監官迎冊寶入宮中。授冊寶官丞相由王宮門出。至奉天殿前丹墀西。轉由西陛。陞自西門入殿。跪云：宣制訖。俯伏。興。引禮引靖江王至御座前跪。受冊寶出。復位。四拜。由東陛降。奉迎冊寶出。奉天東門。並如秦晉等儀。禮部尙書跪奏。詔書用寶。詣案。捧詔書。尙寶卿用寶。以詔書置于案。禮部尙書跪奏。捧詔赴午門。開讀。興。捧詔由中門出。樂作。降自中陛。授冊寶丞相。等官由西門出。降自西階。文武百官迎詔書。開讀於午門外。頒行俱如常儀。侍儀奏禮畢。鳴鞭。皇帝興。樂作。還宮。引進入東門。至殿上。導皇太子出。樂止。是日所司備鼓樂。儀衛司備儀仗。于奉天門西右順門東伺候。親王受冊寶畢。出至奉天門。引禮引親王詣東耳房伺候。於中宮行禮。內使昇冊寶亭東門出。由西道。儀仗鼓吹前行。送至親王殿。各以序奉安于殿內。

### 親王年幼受冊寶儀

受冊之日。內使監官陳設香案於內殿正中。設保抱抱王受冊位于香案之南。設授冊寶內使監官位于香案之東。捧受冊內使位于保抱抱王受冊位之西。捧受寶內使位于捧受冊內使之南。司贊二人位于保抱抱王受寶位之東西。丞相奉迎冊寶至王宮門外。內使監官跪聽制訖。丞相出。內使監官迎冊寶亭入宮中。置于香案之北。保抱抱王由東門入。樂作。至香案前受冊位北面立。樂止。司贊贊行冊禮。內使監官前立。稱有制。內贊贊保抱抱王皆跪。內使監官宣制曰：今封皇子某爲某王，某爲某王，畢。內贊贊保抱

抱王與繼贊授冊寶司賓引保抱一人抱王前立授冊寶監官詣案取冊捧授于保抱保抱受冊以授于捧受冊內使內使跪于保抱之左受冊興退立于西授冊寶監官又詣案取寶捧授于保抱保抱受寶以授于捧受寶內使內使跪於保抱之左受寶興退立于西以次受冊寶皆如上儀內贊贊禮畢樂作司賓引保抱抱王退樂止執事各以冊寶奉置亭中

朝謝中宮

與皇太子受冊朝謝儀同

謝東宮

親王受冊之日內使監官陳設皇太子座于東宮侍儀司設親王拜位于殿庭階上及殿上正中贊禮二人位於殿庭王拜位之東西內贊二人位于殿內王拜位之東西文武官侍立位于殿庭東西將軍六人位于殿門之左右拱衛司設儀仗于殿庭之左右樂工設樂于宮門之外親王于中宮行禮畢引禮引親王便服至東宮門外西向立引進引皇太子便服出宮樂作陞殿樂止引禮引諸王由東階陞樂作至殿庭階上拜位樂止贊禮唱鞠躬拜樂作四拜樂止引禮引秦王由殿東門入樂作引禮立于門外內贊接引秦王至殿內拜位樂止內贊贊禮同唱跪秦王以下皆跪秦王恭謝曰小弟某等茲受封冊謹詣皇太子長兄殿下恭謝謝畢內贊贊禮同唱俯伏興平身引禮引秦王由東門出樂作復位樂止贊禮唱鞠躬

拜樂作四拜樂止贊禮唱禮畢引進啓禮畢皇太子興樂作還宮樂止引禮引親王以次出

親王自行賀及百官賀諸王

親王受冊之日儀衛司於西宮親王殿依親王長幼陳設座位侍儀司設文武官陪立位于殿庭之東西拜位于庭中文東武西內贊二人位于殿內東西相向拱衛司陳設親王儀仗于殿前之東西樂工陳樂于殿庭之南贊禮贊各就位親王於東宮行禮畢引禮引親王便服入殿門樂作陞座樂止文武官入立于殿庭之東西引禮引晉王以下詣秦王前行禮贊禮唱鞠躬晉王以下皆鞠躬樂作四拜樂止引禮引以次親王行禮皆如賀秦王儀贊禮唱禮畢引禮引文武官入就拜位贊禮唱鞠躬樂作四拜樂止引禮引丞相由西門入引禮立于門外丞相至殿上拜位內贊贊禮同唱跪丞相及庭中文武官皆跪丞相稱賀曰某官某等茲遇親王殿下榮膺冊寶封建禮成無任忻忭之至賀畢內贊贊禮同唱俯伏丞相及庭中文武官皆俯伏興平身丞相出引禮引復位贊禮唱鞠躬樂作四拜樂止贊禮唱禮畢內贊啓禮畢親王興樂作出殿門樂止引禮引文武官以次出

東宮及百官稱賀上表箋

親王受冊寶禮既畢至晚內使監于奉天殿陳設御座香案尙寶司設寶案于香案之北侍儀司設表案位于香案之南又設表箋案位于丹墀北之正中設皇太子拜位於丹陛上御前正中親王陪拜位各以



長幼序于皇太子拜位之南。其餘陳設侍衛執事與賀冊立中宮儀同。是日侍衛侍從入迎車駕。上位陞  
謹身殿。侍儀版奏中殿。御用監官奏請上位服袞冕。皇太子親王于奉天門東耳房具冕服。文武官迎表  
至午門前。置龍亭於御道中。禮部官取表函置于案。舍人舉案。宣表官展表。官押表案。引丞相前行。文武  
官分班。俱由西門入。至丹墀中。禮部官押表案于丹墀正中。各就位。文武官各就起居位。侍儀奏外辦。導  
引上位御輿以出。仗動。鼓吹振作。尙寶卿捧寶前導。侍衛如常儀。上位陞御座。樂止。尙寶卿捧寶置于案。  
將軍捲簾。拱衛司鳴鞭。司晨報時雞唱。訖。諸侍從官殿前班。拱衛司官由西階降。引班引同宣表官受表。  
官受箋。內官俱入起居位。東西相向立定。通班唱某衛指揮使臣某以下起居。引班唱鞠躬。平身。指揮以  
下鞠躬。平身。引班東西分引至丹墀中拜位。北面立。贊禮唱鞠躬。樂作。兩拜。樂止。贊禮唱指揮使稍前。指  
揮使前立。贊禮唱鞠躬。指揮以下皆鞠躬。贊禮唱聖躬萬福。唱平身。指揮使以下皆平身。唱復位。指揮使  
復位。唱鞠躬。樂作。兩拜。樂止。通班唱各供事。引班引指揮以下官各就位。引進四人導皇太子親王由東  
門入。樂作。由東陞陞至拜位。樂止。引進分立于其前。唱鞠躬。樂作。四拜。樂止。引進引皇太子由殿東門入。  
樂作。引進立俟于門外。內贊接引皇太子至御座前拜位。樂止。內贊引進同唱跪。皇太子親王皆跪。皇太  
子稱賀云。長子某茲遇諸弟某等受封建國。謹詣父皇陛下稱賀。賀畢。內贊引進同唱俯伏興。平身。皇太  
子親王俯伏興。平身。內贊引皇太子出殿東門。樂作。內贊唱復位。引進引皇太子復位。樂止。引進唱鞠躬。

樂作。四拜。樂止。引進引皇太子親王東降。樂作。至文樓。樂止。司晨再報時訖。通班唱具官臣某以下起居。以下百官稱賀儀與賀册中宮儀同。

### 東宮賀中宮

親王受册次日。內使監官陳設皇后御座於中宮殿上。皇太子拜位于露臺上正中。親王陪拜位序於其後。設皇太子行禮位于御座前。內贊一人位于殿上拜位之東西。陳設儀仗于殿庭之東西。擊執于殿內之左右。樂工陳樂于宮門之外。皇太子于上位前行賀禮畢。司賓引皇太子親王各具冕服。至中宮門外。東向立。內使監官啓聞。皇后首飾褱衣出殿。樂作。陞御座。樂止。司賓引皇太子親王由東階陞。樂作。入就露臺上拜位。樂止。司賓分立于其前。司贊唱鞠躬。樂作。四拜。樂止。司賓引皇太子由殿東門入。樂作。至殿內拜位。樂止。司賓分立于其前。內贊唱跪。皇太子跪稱賀曰。長子某茲遇諸弟某等受封建國。謹詣母后殿下稱賀畢。內贊唱俯伏。興。平身。皇太子俯伏。興。平身。司賓引皇太子東門出。樂作。復位。樂止。司賓唱鞠躬。樂作。四拜。樂止。司賓唱禮畢。內使監官啓禮畢。皇后興。樂作。還宮。樂止。內官引皇太子親王以次出。

### 中宮受內外命婦賀

至日。司賓引內外命婦各服其服。各俟于中宮門外之左右。俟皇太子入。行賀禮畢。內使監官啓聞。司賓二人先引外命婦由西門入。序立于庭中左右。二人引內命婦入就拜位。司贊唱班齊。唱拜。樂作。四拜。樂

止。司賓引班首由西階陞西門入。樂作。至御座前。樂止。內贊司贊唱跪。班首及衆內命婦皆跪。班首稱某封某妾某等。茲遇親王受封建國。恭詣皇后殿下稱賀。畢。內贊司贊同唱興。班首及衆內命婦皆興。司賓引班首由西門出西階。降復位。司贊唱拜。樂作。四拜。樂止。司賓引內命婦出。司賓二人引外命婦入。就拜位。唱拜。樂作。四拜。樂止。司賓引班首由西門入。樂作。至御座前。樂止。內贊司贊同唱跪。班首以下皆跪。班首稱賀曰。妾某氏等。茲遇親王受封建國。恭詣皇后殿下稱賀。畢。內贊司贊同唱興。班首以下皆興。司賓引班首由西門出西階。降。司贊唱拜。樂作。四拜。樂止。司賓引外命婦以次出。

東宮受百官賀

與東宮初立。百官進賀儀同。

成化二十三年續定

其日清晨。上親告奉先殿。

用祝文。

前期鴻臚寺設節冊寶案于奉天殿中。冊東寶西。節居中。設綵輿於丹墀。

之東。教坊司設中和韶樂及大樂。是日早。錦衣衛設鹵簿。駕上具皮弁服。御華蓋殿。執事官行禮如常儀。鴻臚寺奏請陞殿。導駕官前導。上御座。鳴鞭。樂作。文武百官朝服行叩頭禮。侍班。樂止。引禮引正副使入。就拜位。樂作。贊四拜。樂止。傳制官跪奏傳制。執事官舉節冊寶案。由殿左門出。置御道中。傳制官由左門出。稱有制。贊正副使跪。制曰。某年某月某日。冊封第幾子某爲某王。命卿等持節行禮。贊俯伏興。四拜。禮

畢。執事官舉節冊寶置于綵輿中。用黃傘蓋及大樂送至右順門外。正副使朝北立。仍用內樂迎綵輿至各王所居門外。內執事先設香案于中堂之北。設節冊寶案于香案之南。王先具服候節冊寶將至。出迎于門外。內執事捧節冊寶由正門入。先行。王隨行。至王所居正中。各置于案。冊東寶西。節居中。內執事導引王就拜位。贊四拜。樂作。興。平身。樂止。贊宣冊。贊詣冊案前。贊跪。宣冊內官取冊立。宣訖。贊受冊。捧冊內官以冊授王。王受訖。以冊授內侍。內侍跪受。立於西。贊受寶。捧寶內官以寶授王。王受訖。以寶授內侍。內侍跪受。立于西。贊俯伏。樂作。興。平身。樂止。贊復位。贊四拜。樂作。興。平身。樂止。贊禮畢。內導引王送節出門外。內執事捧節出授正副使。報禮畢。正副使持節復命。是日親王受冊寶畢。內侍引詣奉先殿謁告。如常儀畢。內侍引親王詣皇太后前行八拜禮。詣上前。皇后前。俱行八拜禮。詣母妃及皇妃及東宮并妃前。各行四拜禮。畢。回宮。次日文武百官常服致詞稱賀。行禮畢。司禮監請各王具常服。俱詣奉天門前東廡坐。百官常服行四拜禮。

【親王妃冊立儀】

與冊立皇太子妃同。

【公主冊立儀】

洪武九年定。

先期內使監陳設册案于乾清宮御座之東南。設儀仗于丹陛之東西。陳女樂于丹陛之南。尙儀奏外辦。上皮弁服。中宮翟衣。陞御座樂作。陞座訖。樂止。引禮引捧册使者女官就殿上拜位。贊拜。樂作。四拜。樂止。傳制官稱有制。贊捧册使者跪。傳制制曰。今册長女爲某公主。命尙宮正某行禮。舉册官以册立授使者。使者受册。以授執事者。執事者跪受。退立於殿東。贊興。捧册使者興。贊拜。樂作。四拜。樂止。執事者捧册前行。使者隨詣華蓋殿。設香案于正中。設册案于香案前。公主服九鞞四鳳冠翟衣。立于殿西東向。册使至。以册置於案。册使立于册案之東南向。引禮引公主詣拜位。贊禮。贊公主四拜。畢。贊禮請公主詣前。册使稱有制。贊禮。贊公主跪。贊宣册。宣册官取册立宣訖。以册入于盃。贊受册。宣册官以册授公主。公主受册。興。以册置于案。執事者收册。册使興。引禮就導引公主詣上前謝恩。贊八拜。又詣中宮前謝恩。贊八拜。禮畢。次見皇妃。東宮及妃。各王及妃如常儀。公主授以金册。塔皆稱駙馬都尉。賜誥命。皇姑曰大長公主。皇姊妹曰長公主。皇女曰公主。自公主以上俱授金册。

册立儀册文俱見塔禮

明會典卷之四十九 禮部七

【皇子誕生儀】

嘉靖十五年定

皇子初生三日。上親詣南郊奉告。同日祭告奉先殿。崇先殿。遣官分告方澤朝日。夕月。太社稷。帝社稷。天神地祇。行事俱祭服。具告文。行三獻禮。祭品用酒果脯醢。南北郊加太牢。文官五品以上。武官四品以上。俱隨詣南郊。文官三品以上。武官公侯伯。皇親駙馬。仍詣內殿。各具服陪拜。次日上御奉天門。文武百官。具吉服稱賀。先後行四拜禮。仍自誕生之日爲始。各吉服十日。擇日頒詔天下。如常儀。分遣翰林院春坊。六科官齋捧御書。往各王府報知。

萬曆十年更定

皇子初生三日。遣官祭告南北郊。太廟。社稷壇。是日上具袞冕御服。皇極殿。文武百官及天下諸司進表。官員各具朝服。鴻臚寺官致詞稱賀。餘如常儀。仍遣官齋捧詔書。往諭朝鮮國王。

【皇子命名儀】

嘉靖十二年定

皇子生三月。禮部行令欽天監擇命名并行禮吉時。翰林院備查欽賜過宗室名同字行者。進呈御覽。以避重複。開擬數字上請簡定。前期上擇內夫人之敬慎者以奉皇子剪髮。前一日上詣太廟。世廟以命皇子名告於列聖。皇考用香帛脯醢果酒祝文。至日早。保姆抱皇子于寢宮剪髮爲髻。留角如禮。上具皮弁服。御乾清宮。陞御座。皇后率嬪之生皇子者各服其服朝見。行四拜禮。畢。皇后侍立。東面。嬪後。保姆抱皇子出自寢。由西至殿內授皇子於皇后。內贊奏曰。皇后率某嬪某氏。敢用吉日。祇見皇子上降座。命以制辭。遂執皇子之右手而賜之名。皇后敬對畢。遂左還授皇子於保姆。還寢。皇后復率嬪四拜。畢。各還宮。次日。上御奉天門。欽降手勅。以皇子睿名傳諭禮部。行宗人府。上籍玉牒。

隆慶二年更定

皇子生彌月。剪髮如常儀。候至百日。禮部行令欽天監擇命名并行禮吉時。翰林院預擬睿名上請簡定。至期。上以命皇子名告聞於奉先殿。世宗皇帝几筵殿。弘孝殿。神霄殿。用告文祭品如常儀。是日。上具常服。御乾清宮。陞座。皇后率皇貴妃各服其服朝見。行四拜禮。畢。皇后侍立。東面。皇貴妃中立。侍姆抱皇子出自寢。由西至殿內。授皇子於貴妃。內贊奏曰。皇貴妃某氏。敢用吉日。祇見皇子上降座。撫皇子首。咳而賜之名。皇貴妃承旨畢。左還授皇子於侍姆。還寢。皇后復率皇貴妃四拜。畢。各還宮。次日上御皇極門。降手勅如常儀。

【皇女誕生儀】

嘉靖十五年定

皇第一女生三日。上具常服告聞於奉先殿。崇先殿。用香帛脯醢果酒告文。是日百官皆吉服。

【皇女命名儀】

嘉靖十五年定

皇女生彌月。前期。上擇內夫人之敬慎者。以奉皇女剪髮。是日早。保姆抱皇女於寢宮。剪髮爲髻。留縲如禮。上具常服。御乾清宮。陞御座。皇后率妃之生皇女者。具服朝見。行四拜禮。畢。皇后侍立。東面。妃後。保姆抱皇女出自寢。由西。至殿內。授皇女於皇后。內贊奏曰。皇后率妃某氏。祇見皇女。上降座。執皇女之右手。而賜之名。皇后承旨。遂左還。授皇女於保姆。還寢。皇后復率妃四拜。畢。各還宮。是日宮中舉宴禮如常儀。



